


C40
4514



10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

C40-4514

了翁請大藏為寫
家書墨武州紫雲山
積澱院僧中木
為卷之四
宣州三世年抄



B 64853

大方廣佛華嚴經疏鈔卷六十五

于闐國三藏沙門實叉難陀 譯
清涼山大華嚴寺沙門澄觀撰述

入法界品第三十九之六

爾時善財童子於善知識所起最極尊重心。生廣大
清淨解常念大乘專求佛智。願見諸佛。觀法境界。無
障礙智常現在前。決定了知諸法實際。常住際。一切
三世諸剎那際。如虛空際。無二際。一切法無分別際。
一切義無障礙際。一切劫無失壞際。一切如來無際
之際。於一切佛。心無分別。破衆想網。離諸執著。不取

法華

華嚴經疏鈔卷六十五

諸佛衆會道場。亦不取佛清淨國土。知諸衆生皆無有我。知一切聲悉皆如響。知一切色悉皆如影。

疏第十慈行童女。寄灌頂住。鈔寄灌頂住。從前

觀空得無生心。最爲上首。諸佛法水。灌其頂故。

疏文六同前。初依教起求中二。先修入前教。於中

初二句重友解生。次二句念乘思佛。次觀法下。智

證實際。初句能觀智。現決定下。所證窮極。後於一

切佛下。離障自在。

漸次南行。至師子奮迅城。周徧推求慈行童女。聞此

童女。是師子幢王女。五百童女以爲侍從。任毘盧遮

那藏殿。於龍勝栴檀足金線網天衣座上。而說妙法。

疏二漸次下。趣求後友。於中初至處。次聞名。五百

爲侍者。以一期位滿。總攝五位。十法門。互相涉

入之法。而相應故。

善財聞已。詣王宮門。求見彼女。見無量衆。來入宮中。

善財問言。諸人今者。何所往詣。咸報之言。我等欲詣

慈行童女。聽受妙法。善財童子。卽作是念。此王宮門。

旣無限礙。我亦應入。善財入已。見毘盧遮那藏殿。玻

璃爲地。瑠璃爲柱。金剛爲壁。閻浮檀金以爲垣牆。百

千光明。而爲牕牖。阿僧祇摩尼寶。而莊校之。寶藏摩

尼鏡周巾莊嚴以世間最上摩尼寶而爲莊飾無數寶網羅覆其上百千金鈴出妙音聲有如是等不可思議衆寶嚴飾其慈行童女皮膚金色眼紺紫色髮紺青色以梵音聲而演說法。

疏第二善財聞已下見敬諮問中亦三初見中先明遠見表得門未證故後善財入已下親觀依正等。

善財見已頂禮其足繞無數匝合掌前住作如是言聖者我已先發阿耨多羅三藐三菩提心而未知菩薩云何學菩薩行云何修菩薩道我聞聖者善能誘誨願爲我說。

疏二敬三問並可知。

時慈行童女告善財言善男子汝應觀我宮殿莊嚴善財頂禮周徧觀察見一一壁中一一柱中一一鏡中一一相中一一形中一一摩尼寶中一一莊嚴具中一一金鈴中一一寶樹中一一寶形像中一一寶璽珞中悉見法界一切如來從初發心修菩薩行成滿大願具足功德成等正覺轉妙法輪乃至示現入於涅槃如是影像靡不皆現如淨水中普見虛空日月星宿所有衆像如此皆是慈行童女過去世中善

根之力。

疏第三時慈行童女下。正示法界中二。一令觀親證。並依中見正。小大念劫皆無礙等。十住位終。故約報顯。

爾時善財童子。憶念所見諸佛之相。合掌瞻仰慈行童女。爾時童女告善財言。善男子。此是般若波羅蜜普莊嚴門。我於三十六恒河沙佛所求得此法。彼諸如來。各以異門。令我入此般若波羅蜜普莊嚴門。一佛所演。餘不重說。

疏二。爾時善財下。以言顯發於中二。先顯法名因。

後彰法勝用。前中初善財默請。後童女言答。答中初示名。名般若普莊嚴者。有二義。一由般若照一切法。依中有正。一中有多。故所得依。無所不現。般若中云。了色是般若。一切法起色。卽其義矣。二由能證般若。已具諸度莊嚴。故所證所成。亦莊嚴無盡。次下顯因。云彼諸如來。各以異門。令我入此。卽其義也。總攝三十六恒之別。歸於普門。則一嚴一切嚴。故名普嚴。言三十六恒沙者。住位既滿。則六度之中。一一具六。故爲三十六。皆恒沙性德。本覺中來。故云佛所求得。鈔般若等者。卽大品經意。

撰述
華嚴疏鈔卷六十五
具歷諸法。且初歷五蘊云。了色是般若。一切法起色。色尚不可得。云何當有起非起。如是具歷諸法皆然。般若若意。似當諸法之性不異色性。故皆起色。色不可得。當相性空。既無所起。安有能起。若智者意。一切法起色。是假觀。色尚不可得。是空觀。云何當有起非起。卽中道觀。今疏用意。但要初句。以取色性爲諸法依。以性普收。故皆起色。則一色中。具一切法。是事事無礙之意。故隨一法。皆收法界。故得依果一一境中。具諸莊嚴。則莊嚴屬果。以果名因。名普莊嚴。第二意卽因自莊嚴。言三十六下。但

約表義。若約事釋。如休捨處。

善財白言。聖者。此般若波羅蜜普莊嚴門。境界云何。童女荅言。善男子。我入此般若波羅蜜普莊嚴門。隨順趣向。思惟觀察。憶持分別時。得普門陀羅尼百萬阿僧祇陀羅尼門皆悉現前。

疏二善財白言下。顯法勝用。先問後荅。荅中先總。後所謂下別。總中初明修習契證相應。後得普門下。總明所得業用。陀羅尼以智爲體。由得般若普嚴。故能總持萬法。一持一切持。故云普門。以圓融十住。亦同十地。所得無量。百千阿僧祇陀羅尼門。

又彼總此別但舉一持餘三昧等畧而不說。鈔
又彼總此別者謂地經之中但云無量百千阿僧
祇陀羅尼門解脫三昧門亦然設有別者但列其
十今有一百一十八門總持故云別也。

所謂佛刹陀羅尼門佛陀羅尼門法陀羅尼門衆生
陀羅尼門過去陀羅尼門未來陀羅尼門現在陀羅
尼門常在際陀羅尼門。

福德陀羅尼門福德助道具陀羅尼門智慧陀羅尼
門智慧助道具陀羅尼門諸願陀羅尼門分別諸願
陀羅尼門集諸行陀羅尼門清淨行陀羅尼門圓滿

行陀羅尼門。

業陀羅尼門業不失壞陀羅尼門業流住陀羅尼門
業所作陀羅尼門捨離惡業陀羅尼門修習正業陀
羅尼門業自在陀羅尼門善行陀羅尼門持善行陀
羅尼門。

三昧陀羅尼門隨順三昧陀羅尼門觀察三昧陀羅
尼門三昧境界陀羅尼門從三昧起陀羅尼門神通
陀羅尼門。

心海陀羅尼門種種心陀羅尼門直心陀羅尼門照
心稠林陀羅尼門調心清淨陀羅尼門。

撰述
聖嚴師承卷六十五
一
知衆生所從生陀羅尼門。知衆生煩惱。行陀羅尼門。
知煩惱習氣陀羅尼門。知煩惱方便陀羅尼門。知衆
生解陀羅尼門。知衆生行陀羅尼門。知衆生行不同
陀羅尼門。知衆生性陀羅尼門。知衆生欲陀羅尼門。
知衆生想陀羅尼門。

普見十方陀羅尼門。說法陀羅尼門。大悲陀羅尼門。
大慈陀羅尼門。寂靜陀羅尼門。言語道陀羅尼門。方
便非方便陀羅尼門。隨順陀羅尼門。差別陀羅尼門。
普入陀羅尼門。無礙際陀羅尼門。普徧陀羅尼門。佛
法陀羅尼門。菩薩法陀羅尼門。聲聞法陀羅尼門。獨

覺法陀羅尼門。世間法陀羅尼門。

世界成陀羅尼門。世界壞陀羅尼門。世界住陀羅尼
門。淨世界陀羅尼門。垢世界陀羅尼門。於垢世界現
淨陀羅尼門。於淨世界現垢陀羅尼門。純垢世界陀
羅尼門。純淨世界陀羅尼門。平坦世界陀羅尼門。不
平坦世界陀羅尼門。覆世界陀羅尼門。因陀羅網世
界陀羅尼門。世界轉陀羅尼門。知依想住陀羅尼門。
細入麤陀羅尼門。麤入細陀羅尼門。

見諸佛陀羅尼門。分別佛身陀羅尼門。佛光明莊嚴
網陀羅尼門。佛圓滿音陀羅尼門。佛法輪陀羅尼門。

撰述
善廣疏鈔卷之十一
成就佛法輪陀羅尼門。差別佛法輪陀羅尼門。無差別佛法輪陀羅尼門。解釋佛法輪陀羅尼門。轉佛法輪陀羅尼門。能作佛事陀羅尼門。分別佛聚會陀羅尼門。入佛聚會海陀羅尼門。普照佛力陀羅尼門。諸佛三昧陀羅尼門。諸佛三昧自在用陀羅尼門。諸佛所任陀羅尼門。諸佛所持陀羅尼門。諸佛變化陀羅尼門。佛知衆生心行陀羅尼門。諸佛神通變現陀羅尼門。住兜率天宮。乃至示現入于涅槃陀羅尼門。利益無量衆生陀羅尼門。入甚深法陀羅尼門。入微妙法陀羅尼門。

菩提心陀羅尼門。起菩提心陀羅尼門。助菩提心陀羅尼門。諸願陀羅尼門。諸行陀羅尼門。神通陀羅尼門。出離陀羅尼門。總持清淨陀羅尼門。智輪清淨陀羅尼門。智慧清淨陀羅尼門。菩提無量陀羅尼門。自心清淨陀羅尼門。

疏二別顯中有百一十八門。畧分十位。初八總知依正理事持。二福德下九門。明願行持。三業下九門。明業持。四三昧下六門。明正受體用持。五心海下五門。染淨諸心持。六知衆生下十門。知所化持。七普見十方下十七門。知能化持。八世界成下十

撰述
華嚴疏鈔卷之十
七門明知刹海自在持。於中言世界轉者。晉經云
迴轉世界。九見諸佛下二十五門。知佛海自在持。
十菩提心下十二門。明菩提因果持。自心清淨卽
性淨菩提。總攝諸門不出於此。

善男子。我唯知此般若波羅蜜普莊嚴門。如諸菩
薩摩訶薩。其心廣大等虛空界。入於法界。福德成滿。
任出世法。遠世間行。智眼無翳。普觀法界。慧心廣大。
猶如虛空。一切境界。悉皆明見。獲無礙地。大光明藏。
善能分別一切法義。行於世行。不染世法。能益於世。
非世所壞。普作一切世間依止。普知一切衆生心行。

隨其所應。而爲說法。於一切時。恒得自在。而我云何
能知能說彼功德行。

疏第四謙已推勝可知。

善男子。於此南方有一國土。名爲三眼。彼有比丘。名
曰善見。汝詣彼問菩薩云。何學菩薩。行修菩薩道。

疏第五指示後友。國名三眼者。施爲行首。復開導
自他。如目導餘根。故名爲眼。財施無著。成於慧眼。
無畏之施。成於慈眼。法施開於法眼。故復云三。用
上三眼。見無不善。又施行內成。勝報外現。見者皆
善故。出任之行故。以出家表之。又行本令物得出。

離故。
將善財童子頂禮其足。繞無數匝。戀慕瞻仰。辭退而行。

疏上明十任意。

爾時善財童子。思惟菩薩所任行甚深。思惟菩薩所證法甚深。思惟菩薩所入處甚深。思惟衆生微細智甚深。思惟世間依想任甚深。思惟衆生所作行甚深。思惟衆生心流注甚深。思惟衆生如光影甚深。思惟衆生名號甚深。思惟衆生言說甚深。思惟莊嚴法界甚深。思惟種植業行甚深。思惟業莊飾世間甚深。

疏大文第三善見已下。有十善友寄十行位。位各一人。初善見比丘寄歡喜行。鈔寄歡喜行者。施隨自他。故名歡喜。

疏文亦具六。初依教趣求中亦二。先念前友教中。有十三句。初總餘別。別分爲三。初二約菩薩論深。一所證法界。卽事而真故。二入菩薩地智。唯證相應故。鈔初二約菩薩者。理智一對。

疏次有七句。約衆生辨深。一報類難知故。鈔一報類難知者。如廻向品說。

疏二妄想爲因。卽無性故。鈔二妄想爲因。卽無

性者。妄想爲因。釋依想住。卽無性。言釋於甚深。故楞伽云。前聖所知。轉相傳授。妄想無性。斯爲自覺聖智之境。故甚深也。

疏三。染分行業。唯佛知故。鈔三。染分行業等者。以約衆生故。如一孔雀毛。一切種因相等。

疏四。感異熟識。若種若現。恒轉如流。不可知故。

鈔四。感異熟識者。行相深細。故經云。阿陀那識甚深細等。亦如楞伽上中下修。照見自心生滅流注。

又經云。諸識有二種生。謂流注生。相生。有二種住。謂流注住。相生。有二種滅。謂流注滅。相生。古同釋。

二。流注是八識相續。然相有三種。已如前引。今此卽利那流注。與上照見自心生滅流注義相符也。若常照之見。其無性卽自覺聖智故。

疏五。所變影像。若內若外。緣無性故。鈔五。所變影像等者。相分卽是影像。第八緣三種境。境卽相分。謂種子根身。卽內境也。器世間。卽外境也。變現心所等。皆是內也。色爲二所現。影亦通內外。外卽五塵。內卽五根。

疏六。名無得物之功。而不失所名之物故。鈔六。名無得物之功。已見上文。

疏七文字言說皆解脫故。鈔七文字言說皆解脫故者。卽淨名中天女析身子。亦如前引。

疏後二句合辨前文。一。染淨二分。皆嚴法界。而無嚴故。二。上二分業。不相知故。三。各自莊飾染淨世間。果報無失。卽同真故。總上二分。皆是般若波羅蜜。普莊嚴故。所以思之。鈔皆嚴法界。而無嚴者。故金剛云。莊嚴佛土。卽非莊嚴。是各莊嚴。謂雖復莊嚴。無能嚴心。則稱實理事。理無礙。方真嚴也。總上二分下。結法所屬。

漸次遊行。至三眼國。於城邑聚落。村隣市肆。川原山

谷。一切諸處。周徧求覓。善見比丘。

疏二起求後友中。市肆等處。處處求者。顯隨緣造修。無不在故。

見在林中。經行往返。壯年美貌。端正可喜。其髮紺青。右旋不亂。頂有肉髻。皮膚金色。頸文三道。額廣平正。眼目修廣。如青蓮華。脣口丹潔。如頻婆果。臂標卍字。七處平滿。其臂纖長。其指網縵。手足掌中。有金剛輪。其身殊妙。如淨居天。上下端直。如尼拘陀樹。諸相隨好。悉皆圓滿。如雪山王。種種嚴飾。目視不瞬。圓光一尋。

疏第二。見在林中下。見敬諮問中。先見次敬。後問。見中三。先見身勝相。見在林者。行之初故。同佛相者。如說修行。順佛果故。於中七處平滿者。兩手兩足。兩肩及項。言其身殊妙。如淨居天者。準晉經卽師子。上身相矣。上下端直。如尼拘陀樹者。準晉經云。其身圓滿。如尼俱陀樹。此則但是一相。言諸相隨好者。上但列十四。故總結之。目視不瞬。圓光一尋。復是二相。都列十六耳。餘至瞿波處釋。鈔此則但是一相者。以晉經合其身殊妙。屬後尼拘陀故。今經二相。彼但成一。然如尼拘陀者。其枝橫布。與上聳相稱。非如建木。一向直聳。非如傍覆。一向婆娑。故云上下端直。若順樹相。圓滿最妙。此明不長不短。如人橫尋。與身相稱。七尺之人。尋亦七尺。此爲福相。

智慧廣博。猶如大海。於諸境界。心無所動。若沉若舉。若智非智。動轉戲論。一切皆息。得佛所行平等境界。大悲教化一切衆生。心無暫捨。爲欲利樂一切衆生。爲欲開示如來法眼。爲踐如來所行之道。不遲不速。審諦經行。

疏二。智慧下。明其心相。卽止觀雙運。止過則沉。智

撰述
華嚴疏鈔卷六十一
一
過則舉不沉不舉則正受現前不智不愚則雙契
中道起念止觀皆成動轉雙非再造未離戲論雖
止觀雙運而無心寂照則一切皆息爲踐如來所
行之道隨所履道卽是法門鈔明其心相者然
世之相亦有三類一色相二聲相三心相心相最
勝然可修成舍弘仁慧是勝相也今此正明菩薩
心相言卽止觀雙運者經初二句標示止觀初智
慧爲觀後於諸境下卽止從止過下釋若沉若舉
已下經然沉舉畧有二種一昏沉掉舉此相卽籠
亦所不論二細沉舉卽如疏辨若靜無遺照動不

離寂卽是雙行不沉不舉故云正受現前然經一
切皆息總該上四而疏釋之四對別顯上釋第一
若沉若舉竟二不智不愚則雙契中道者取下皆
息該此名不智不愚若智牒前觀也非智牒前止
也今由皆息則止觀兩亡爲眞止觀方契中道三
起念下釋動轉皆息若有止觀卽爲動轉今由兩
亡故無動轉四雙非下釋戲論字言雙非者非止
非觀斯卽第四戲論謗也再遣者又亡雙非謂非
非止觀等由迹不亡如楔出楔故並戲論今云皆
息戲論自亡上但遮過從得佛下顯其成得故雖

止觀雙運。而無心寂照等。雙運卽爲雙照。無心卽爲雙遮。遮照同時。互融平等。卽是如如平等之境。無量天龍夜叉乾闥婆阿修羅迦樓羅緊那羅摩睺羅伽。釋梵護世人。與非人前後圍繞。王方之神。隨方廻轉。引導其前。足行諸神。持寶蓮華。以承其足。無盡光神。舒光破暗。闍浮幢林神。雨衆雜華。不動藏地神。現諸寶藏。普光明虛空神。莊嚴虛空。成就德海神。雨摩尼寶。無垢藏須彌山神。頭頂禮敬。曲躬合掌。無礙力風神。雨妙香華。春和王夜神。莊嚴其身。舉體投地。常覺王晝神。執普照諸方摩尼幢。住在虛空。放大光明。

明

疏三無量下。明諸侍從。不無表法。恐煩不說。

時善財童子。詣比丘所。頂禮其足。曲躬合掌。曰。聖者。我已先發阿耨多羅三藐三菩提心。求菩薩行。我聞聖者。善能開示諸菩薩道。願爲我說。菩薩云何學菩薩行。云何修菩薩道。

疏敬問可知。

善見答言。善男子。我年旣少。出家又近。我此生中。於三十八恒河沙佛所。淨修梵行。或有佛所。一日一夜淨修梵行。或有佛所。七日七夜淨修梵行。或有佛所。

半月一月一歲百歲萬歲億歲那由他歲乃至不可說不可說歲或一小劫或半大劫或一大劫或百大劫乃至不可說不可說大劫聽聞妙法受行其教莊嚴諸願入所證處淨修諸行滿足六種波羅蜜海亦見彼佛成道說法各各差別無有雜亂住持遺教乃至滅盡亦知彼佛本所興願以三昧願力嚴淨一切諸佛國土以入一切行三昧力淨修一切諸菩薩行以普賢乘出離力清淨一切佛波羅蜜。

疏第三善見答下正示法界中二初示依緣得法後又善男子下顯法業用今初分三初總序初

入行位故云年少創離十住之家名爲出家又近言我此生者畧有二義一念劫圓融故如毘目處說二顯入解行生非見聞生故供三十八恆者過前位故次或有下明所修時分後聽聞下所作成益於中初自修願智行次見果用後知佛修因

又善男子我經行時一念中一切十方皆悉現前智慧清淨故一念中一切世界皆悉現前經過不可說不可說世界故一念中不可說不可說佛刹皆悉嚴淨成就大願力故一念中不可說不可說衆生差別行皆悉現前滿足十力智故一念中不可說不可說

諸佛清淨身皆悉現前成就普賢行願力故。一念中恭敬供養不可說不可說佛刹微塵數如來成就柔軟心供養如來願力故。一念中領受不可說不可說如來法得證阿僧祇差別法住持法輪陀羅尼力故。一念中不可說不可說菩薩行海皆悉現前得能淨一切行。如因陀羅網願力故。一念中不可說不可說諸三昧海皆悉現前得於一三昧門入一切三昧門皆令清淨願力故。一念中不可說不可說諸根海皆悉現前得了知諸根際於一根中見一切根願力故。一念中不可說不可說佛刹微塵數時皆悉現前得

於一切時轉法輪。眾生界盡法輪無盡願力故。一念中不可說不可說一切三世海皆悉現前得了知一切世界中一切三世分位智光明願力故。

疏二顯法業用中有十二句各先辨業用後出所由。然不出願智行如文思之。總云一念者以得無依無念智故無法不現。

善男子。我唯知此菩薩隨順燈解脫門。如諸菩薩摩訶薩。如金剛燈。於如來家真正受生。具足成就不死命根。常然智燈無有盡滅。其身堅固不可沮壞。現於如幻色相之身。如緣起法無量差別。隨眾生心。各各

示現形貌色相。世無倫匹。毒刃火災。所不能害。如金剛山。無能壞者。降伏一切諸魔外道。其身妙好。如真金山。於天人中。最爲殊特。名稱廣大。靡不聞知。觀諸世間。咸對目前。演深法藏。如海無盡。於大光明。普照十方。若有見者。必破一切障礙。大山必拔。一切不善根本。必令種植。廣大善根。如是之人。難可得見。難可出世。而我云。何能知能說彼功德。行。

疏第四謙已推勝中。謙已結前。名隨順燈者。用無念之眞智。順法順機。無不照故。後如諸下。推勝中。初句爲總。亦別顯家族勝。上但云燈。照未必常。故

今推之。明金剛智燈。親證眞如。爲眞正生。則常照矣。不同解行生也。二報命勝。由所證常故。卽金剛義。三內智勝。如於所證無盡滅故。卽是燈義。四報體勝。法性成身。相不遷故。亦金剛義。五現於下。明業用勝。卽對上隨順義。以是卽體之用故。皆不可壞。餘並可知。指示後友。次文當說。

善男子。於此南方。有一國土。名曰名聞。於河渚中。有一童子。名自在王。汝詣彼問菩薩云。何學菩薩行。修菩薩道。

時善財童子。爲欲究竟菩薩勇猛清淨之行。欲得善

薩大力光明。欲修菩薩無勝無盡諸功德行。欲滿菩薩堅固大願。欲成菩薩廣大深心。欲持菩薩無量勝行。於菩薩法心無厭足。願入一切菩薩功德。欲常攝御一切衆生。欲超生死稠林曠野。於善知識常樂見聞。承事供養。無有厭倦。頂禮其足。統無量。殷勤瞻仰。辭退而去。

爾時善財童子。受善見比丘教已。憶念誦持。思惟修習。明了決定。於彼法門。而得悟入。天龍夜叉。乾闥婆衆。前後圍繞。向名聞國。周徧求覓。自在王童子。時有天龍乾闥婆等。於虛空中。告善財言。善男子。今此童

子在河渚上。

疏第二自在王寄饒益行。鈔寄饒益行者。三聚淨戒。能益自他。故云饒益。

疏初依教趣求。國曰名聞者。能持淨戒。現世果故。河渚上者。若持淨戒。生死慶河。不漂溺故。又無量福。河常流注。故童子自在王者。三業無非。六根離過。故得自在。則戒爲王矣。戒淨無染。故云童子。

鈔能持淨戒。現世界故者。戒經云。明人能護戒。能得三種樂。名譽及利養。死得生天上。福河常流注者。不持戒者。可犯之境。皆有犯分。由持戒故。於無

盡境。皆發勝福故。

爾時善財。卽詣其所。見此童子。十千童子。所共圍繞。聚沙爲戲。善財見已。頂禮其足。繞無量帀。合掌恭敬。却在一面。白言。聖者。我已先發阿耨多羅三藐三菩提心。而未知菩薩云何學菩薩行。修菩薩道。願爲解說。

疏第二。爾時善財下。見敬諮問中。見聚沙者。恒沙功德。由戒積集故。

自在王言。善男子。我昔曾於文殊師利童子所。修學書數算印等法。卽得悟入一切工巧神通智法門。

疏第三。自在王言下。正示法界。於中二。初舉法門名體。二善男子我因下。明業用。今初文殊所學者。有智能護戒故。書者能詮。止作分明故。數者表四重十重。乃至三千威儀。八萬細行故。算者一一之因。感幾何果故。印者持犯善惡。感果決定故。等者。等餘醫方。成五明故。上明所學。下辨所悟。工巧神通。皆智所爲故。亦表修戒發定慧故。鈔有智能護戒者。文殊王智故。此言亦是戒經云。當觀如是處。有智勤護戒。戒淨有智慧。便得第一道。釋曰。上二句以智爲因。下二句是智之果。四重十重者。

四重通二乘別解脫戒十重已下大乘四重通亦
唯大故彌勒受戒羯磨但受四不可過謂十重之
中最後四戒謂慳貪瞋讚毀及謗三寶故成五明
者五明在下業中上之諸名然但是聲明中義並
如五地今當畧釋。

善男子我因此法門故得知世間書數算印界處等
法亦能療治風癘消瘦鬼魅所著如是所有一切諸
病亦能造立城邑聚落園林臺觀宮殿屋宅種種諸
處亦善調鍊種種仙藥亦善營理田農商賈一切諸
業取捨進退咸得其所又善別知衆生身相作善作

惡當生善趣當生惡趣此人應得聲聞乘道此人應
得緣覺乘道此人應入一切智地如是等事皆悉能
知亦令衆生學習此法增長決定究竟清淨善男子
我亦能知菩薩算法所謂一百洛又爲一俱胝俱胝
俱胝爲一阿庾多阿庾多阿庾多爲一那由他那由
他那由他爲一頻婆羅頻婆羅頻婆羅爲一矜羯羅
廣說乃至優鉢羅優鉢羅爲一波頭摩波頭摩波頭
摩爲一僧祇僧祇僧祇爲一起起起爲一喻喻喻爲一
一無數無數無數爲一無數轉無數轉無數轉爲一
無量無量無量爲一無量轉無量轉無量轉爲一無

明中法施設建立名句文身等故其數算印卽聲明數施設建立通治取與中生疑障其界處等法卽是因明故新經云種種智論名是論體卽言論諍論等雜辨諸者卽餘三明一卽鑿方明於中風病消瘦是病相鬼魅所著亦是病相亦是病因因鬼等病故其能療治卽是除斷能字亦是斷已不生二亦能造下卽工巧明瑜伽十五有十二工巧今畧有五一營造工業二亦善訓練種種仙藥卽和合工業三善管理田農卽營農工業四問估卽商賈工業其一切諸業卽該諸文所不說者更有

七不說謂音樂書算成熟方所事王變化咒術五又善別知衆生身相卽占相工業三作善作惡下卽是內明然瑜伽有四施設建立一事二理三攝聖教四所應知今明於理於中有二一知六趣因果二此人下知三乘因果從如是等下總結兼於餘三謂令其習學決定究竟卽攝聖教聖教所知應辨事理卽三藏故下知算亦聲明攝

善男子我唯知此一切工巧大神通智光明法門如諸菩薩摩訶薩能知一切諸衆生數能知一切諸法品類數能知一切諸法差別數能知一切三世數能

撰述
聖嚴師金卷六十一
知一切衆生名數。能知一切諸法名數。能知一切諸如來數。能知一切諸佛名數。能知一切諸菩薩數。能知一切菩薩名數。而我何能說其功德。示其所行。顯其境界。讚其勝力。辯其樂欲。宣其助道。彰其大願。歎其妙行。闡其諸度。演其清淨。發其殊勝。智慧光明。善男子。於此南方有一大城。名曰海任。有優婆夷。名爲具足。汝詣彼問菩薩云。何學菩薩行。修菩薩道。時善財童子。聞是語已。舉身毛豎。歡喜踊躍。獲得希有信樂寶心。成就廣大利衆生心。悉能明見一切諸佛。出興次第。悉能通達甚深智慧清淨法輪。於一切

趣。皆隨現身。了知三世平等境界。出生無盡功德大海。放大智慧自在光明。開三有城所有關鑰。頂禮其足。繞無量帀。殷勤瞻仰。辭退而去。

爾時善財童子。觀察思惟。善知識教。猶如巨海。受大雲雨。無有厭足。作是念言。善知識教。猶如春日。生長一切善法根苗。善知識教。猶如滿月。凡所照及。皆使清涼。善知識教。如夏雪山。能除一切諸獸熱渴。善知識教。如芳池日。能開一切善心蓮華。善知識教。如大寶洲。種種法寶。充滿其心。善知識教。如闍浮樹。積集一切福智華果。善知識教。如大龍王。於虛空中。遊戲

自在。善知識教如須彌山。無量善法。二十三天。於中止住。善知識教。猶如帝釋。衆會圍繞。無能映蔽。能伏異道。修羅軍衆。如是思惟。

疏第三具足優婆夷。寄無違逆行。鈔寄無違逆行。忍順物理。名無違逆。

疏城名海住者。近海而住。故安住於忍。如海包容。故友名具足者。一器之中。無不具故。忍器徧容一切。德故忍辱柔和。故寄女人。

漸次遊行。至海住城。處處尋覓。此優婆夷。時彼衆人。咸告之言。善男子。此優婆夷。在此城中。所住宅內。

疏文中。初依教趣求可知。

善財聞已。卽詣其門。合掌而立。其宅廣博。種種莊嚴。衆寶垣牆。周匝圍繞。四面皆有寶莊嚴門。善財入已。見優婆夷。處於寶座。盛年好色。端正可喜。素服垂髮。身無瓔珞。其身色相。威德光明。除佛菩薩。餘無能及。於其宅內。敷十億座。超出人天一切所有。皆是菩薩業力成就。宅中無有衣服飲食。及餘一切資生之物。但於其前。置一小器。復有一萬童女。圍繞威儀色相。如天姪女。妙寶嚴具。莊飾其身。言音美妙。聞者喜悅。常在左右。親近瞻仰。思惟觀察。曲躬低首。應其教命。

撰述
善廣疏金卷六十一
彼諸童女。身出妙香。普熏一切。若有衆生。遇斯香者。皆不退轉。無怒害心。無怨結心。無慳嫉心。無誚誑心。無險曲心。無憎愛心。無瞋恚心。無下劣心。無高慢心。生平等心。起大慈心。發利益心。任律儀心。離貪求心。聞其音者。歡喜踊躍。見其身者。悉離貪染。

疏第二善財聞已下。見敬諮問。初見中四。一見外依報。二見友正報。端正可喜者。忍之報故。素服等者。忍華飾故。三於其宅下。見內依報。四復有下。明其眷屬萬行皆順忍故。

爾時善財。既見具足優婆夷已。頂禮其足。恭敬圍繞。合掌而立。自言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者。善能誘誨。願爲我說。

疏二敬三問並可知。

彼卽告言。善男子。我得菩薩無盡福德藏。解脫門。能於如是一小器中。隨諸衆生。種種欲樂。出生種種美味飲食。悉令充滿。假使百衆生。千衆生。百千衆生。億衆生。百億衆生。千億衆生。百千億那由他衆生。乃至不可說不可說衆生。假使閻浮提微塵數衆生。一四天下微塵數衆生。小千世界。中千世界。大千世界。乃

至不可說不可說佛刹微塵數衆生假使十方世界一切衆生隨其欲樂悉令充滿而其飲食無有窮盡亦不減少如飲食如是種種上味種種狀座種種衣服種種卧具種種車乘種種華種種鬘種種香種種塗香種種燒香種種末香種種珍寶種種瓔珞種種幢種種幡種種蓋種種上妙資生之具隨意所樂悉令充足。

疏第三彼卽下。正示法界於中二。初舉法門名體。器中出物與福無盡故稱法界福之所招故後能於如是下辨業用中三。初正顯業用。次令見同益。

三使其目驗。前中三。初益衆生。次益二乘。後益菩薩。今初亦三。初總明。以是稱性之具。卽一小器融同法界無盡緣起故。用無不應。無不益。而其法界體無增減。又表忍必自卑故小。法忍同如一味爲一。內空外假爲器。忍能包含無外。故隨出無盡。次出生下。別明出味。後如飲食下。舉一例餘。鈔又表忍必自卑下。上直約善友依報釋。此下約表位釋。忍必謙卑。卑而不可逾。故小而大容。上通二忍。法忍同如。卽諦察法忍。內空外假者。埏埴以爲器。當其無有器之用。卽假能用。卽空能大。無有不

成於空故。故因外假而內有所用。老子云有之以爲利。無之以爲用。無空不成於假。故空能多容。此二無二中道器也。

又善男子。假使東方一世界中。聲聞獨覺。食我食。已皆證聲聞辟支佛果。住最後身。如一世界中。如是百世界。千世界。百千世界。億世界。百億世界。千億世界。百千億世界。百千億那由他世界。閻浮提微塵數世界。一四天下微塵數世界。小千國土微塵數世界。中千國土微塵數世界。三千大千國土微塵數世界。乃至不可說不可說佛刹微塵數世界。中所有的一切聲

聞獨覺。食我食。已。皆證聲聞辟支佛果。住最後身。如於東方。南西北方。四維上下。亦復如是。又善男子。東方一世界。乃至不可說不可說佛刹微塵數世界中。所有一生。所繫菩薩。食我食。已。皆菩提樹下。坐於道場。降伏魔軍。成阿耨多羅三藐三菩提。如東方。南西北方。四維上下。亦復如是。

疏二又善男子假使下。明益二乘。二乘雖不立忍名。亦忍盡無生理。方成果故。鈔二乘雖然不立忍名。義如玄中。

疏三又善男子東方下。益菩薩約事如受於乳糜。

約法謂餐上品寂滅之忍得菩提故淨名香積與此大同。鈔約事如受乳糜者卽世尊初成道受二牧牛女乳糜亦如前引約法食上品寂滅忍者上品屬佛故如十忍品淨名香積與此大同謂受食已得聖果等故然淨名有二處文一香積品中取飯來竟維摩詰語舍利弗等諸大聲聞仁者可食如來甘露味飯大悲所熏無以限量食之使不消也生公釋云以其向念故教食也亦欲因以食之爲理泥洹是甘露之法而食此食者必以得之故飯中有甘露味焉大悲所熏者使人得悟爲外

熏義豈曰食能大悲力焉然則飯之爲氣大悲也無以限量者飯出大悲卽無限矣而限言少者則不消也釋曰此乃以悲熏食得涅槃果以果名因爲甘露味未言食卽表於涅槃若卽食爲涅槃理義則善成矣二菩薩行品因淨名文殊禮觀世尊阿難怪問今所聞香昔所未有是爲何香佛言是彼菩薩毛孔之香身子亦言我等毛孔亦出是香問其從來云食是香飯阿難問云是香氣在當久如維摩詰言至此飯消曰久如當消曰此飯勢力至于七日然後乃消又阿難若聲聞人未入正

撰述
華嚴疏鈔卷六十一
五
位。食此飯者。得入正位。已入正位。得心解脫。若未發大乘之意。至發意已。發意得無生忍。已得無生忍。至一生補處。然後乃消。譬如有藥。名曰上味。其有服者。身諸毒滅。然後乃消。此飯如是。滅除一切諸煩惱毒。然後乃消。疏廣釋相意。問云。香飯是色法。云何斷惑。遠公釋云。由大悲香飯。不思議力。所以能斷。如輪王有一寶牀。聖王居上。卽能離欲。逮得四禪。玉女雖見。如覩佛像。不生欲心。况佛菩薩所受境界。如華手經說。菩薩有一照法性冠。著此冠時。一切諸法。悉現在心。諸事亦爾。指師釋云。雖

有此釋。道理不然。豈有色法。性能斷惑。但以香飯資發觀智。能斷煩惱。非是食體。卽能斷惑。釋曰。此諸古德意。並未愜當。且約勝緣。以解香飯。不知香飯以表法門。生公稍近於理。故云。七日消者。不過七日。一生補處。卽七日之內。必有所得矣。然一食之悟。亦不得有二階進也。止一生補處者。顯佛無因得也。無生菩薩。及正位之人。豈得假外。方得進哉。而今云爾者。以明此飯。爲宣理之極備。有其義焉。釋曰。此以有表理意也。然淨名中。食意。通理智。大悲。甘露味飯。卽二德。涅槃。涅槃中經。亦以涅槃

撰述
華嚴疏鈔卷六十一
將喻甘露其飯香氣卽表大悲從體起用。熏眾生故。今此寄位。故表於忍。忍通五忍。無法不攝。能忍是智。所忍是理。廣說利他。大悲熏也。然淨名云。得忍則消。亦該五忍之意。不爲此釋。殊爲淺近。

善男子。汝見我此十千童女眷屬已不。荅言。已見。優婆夷言。善男子。此十千童女而爲上首。如是眷屬百萬阿僧祇。皆悉與我同行。同願。同善根。同出離道。同清淨解。同清淨念。同清淨趣。同無量覺。同得諸根。同廣大心。同所行境。同理。同義。同明了法。同淨色相。同無量力。同最精進。同正法音。同隨類音。同清淨第一

音。同讚無量清淨功德。同清淨業。同清淨報。同大悲周普。救護一切。同大悲周普。成熟眾生。同清淨身業。隨緣集起。令見者欣悅。同清淨口業。隨世語言。宣布法化。同往詣一切諸佛。衆會道場。同往詣一切佛刹。供養諸佛。同能現見一切法門。同住菩薩清淨行地。善男子。是十千童女。能於此器。取上飲食。一刹那頃。徧至十方。供養一切後身菩薩。聲聞。獨覺。乃至徧及諸餓鬼趣。皆令充足。善男子。此十千女。以我此器。能於天中充足天食。乃至人中充足人食。善男子。且待須臾。汝當自見。說是語時。善財則見無量衆生。從四

門入皆優婆夷本願所請既來集已敷座令坐隨其所須給施飲食悉使充足。

疏二善男子汝見下令見同益三且待下令其目驗及後三段文並可知。

告善財言善男子我唯知此無盡福德藏解脫門如諸菩薩摩訶薩一切功德猶如大海甚深無盡猶如虛空廣大無際如如意珠滿衆生願如大聚落所求皆得如須彌山普集衆寶猶如奧藏常貯法財猶如明燈破諸黑暗猶如高蓋普蔭羣生而我云何能知能說彼功德行。

善男子南方有城名曰大興彼有居士名曰明智汝詣彼問菩薩云何學菩薩行修菩薩道。

時善財童子頂禮其足繞無量匝瞻仰無厭辭退而去。

爾時善財童子得無盡莊嚴福德藏解脫光明已思惟彼福德大海觀察彼福德虛空趣彼福德聚登彼福德山攝彼福德藏入彼福德淵遊彼福德池淨彼福德輪見彼福德藏入彼福德門行彼福德道修彼福德種漸次而行至大興城周徧推求明智長者於善知識心生渴仰以善知識熏習其心於善知識志

撰述
華嚴疏鈔卷六十一
欲堅固方便求見諸善知識心不退轉願得承事諸善知識心無懈怠知由依止善知識故能滿眾善知由依止善知識故能生眾福知由依止善知識故能長眾行知由依止善知識故不由他教自能承事一切善友如是思惟時長其善根淨其深心增其根性益其德本加其大願廣其大悲近一切智具普賢道照明一切諸佛正法增長如來十力光明。

疏第四明智居士寄無屈撓行 鈔寄無屈撓行者勤無怠退故。

疏初依教趣求中初依前修治後漸次下趣求後友城名大興者起大精進故友名明智者進足必假智日導故。

爾時善財見彼居士在其城內市四衢道七寶臺上處無數寶莊嚴之座其座妙好清淨摩尼以爲其身金剛帝青以爲其足寶繩交絡五百妙寶而爲校飾敷天寶衣建天幢幡張大寶網施大寶帳閻浮檀金以爲其蓋毘瑠璃寶以爲其竿令人執持以覆其上鵝王羽翮清淨嚴潔以爲其扇熏眾妙香雨眾天華左右常奏五百樂音其音美妙過於天樂眾生聞者無不悅豫十千眷屬前後圍繞色相端嚴人所喜見。

天莊嚴具以爲嚴飾於天人中最勝無比。悉已成就。菩薩志欲皆與居士同昔善根。侍立瞻對。承其教命。爾時善財頂禮其足。繞無量匝。合掌而立。白言。聖者。我爲利益一切衆生故。爲令一切衆生出諸苦難故。爲令一切衆生究竟安樂故。爲令一切衆生出生死海故。爲令一切衆生在法寶洲故。爲令一切衆生枯竭慶河故。爲令一切衆生起大慈悲故。爲令一切衆生捨離欲愛故。爲令一切衆生渴仰佛智故。爲令一切衆生出生死曠野故。爲令一切衆生樂諸佛功德。故爲令一切衆生出三界城故。爲令一切衆生入一

切智城故。發阿耨多羅三藐三菩提心。而未知菩薩云何學菩薩行。云何修菩薩道。能爲一切衆生作依止處。

疏第二爾時善財下。見敬諮問中。先見於市四衢者。表處喧不撓。無不通故。敬問可知。

長者告言。善哉善哉。善男子。汝乃能發阿耨多羅三藐三菩提心。善男子。發阿耨多羅三藐三菩提心。是人難得。若能發心。是人則能求菩薩行。值遇善知識。恒無厭足。親近善知識。恒無勞倦。供養善知識。恒不疲懈。給侍善知識。不生憂感。求覓善知識。終不退轉。

撰述
善願鈔卷六十一
一
愛念善知識終不放捨承事善知識無暫休息瞻仰
善知識無時憇止行善知識教未曾怠惰稟善知識
心無有誤失善男子汝見我此衆會人不善財荅言
唯然已見居士言善男子我已令其發阿耨多羅三
藐三菩提心生如來家增長白法安住無量諸波羅
蜜學佛十力離世間種住如來種棄生死輪轉正法
輪滅三惡趣住正法趣如諸菩薩悉能救護一切衆
生

疏第三長者告下稱讚授法中三初歎發心勝能
二善男子汝見下示已所化發心眷屬生如來家

者同四任中生也鈔同四任中生者四任生聖
教家以三賢十聖大類相似故前同四任後同四
地

善男子我得隨意出生福德藏解脫門凡有所須悉
滿其願所謂衣服瓔珞象馬車乘華香幢蓋飲食湯
藥房舍屋宅牀座燈炬奴婢牛羊及諸侍使如是一
切資生之物諸有所須悉令充滿乃至爲說眞實妙
法善男子且待須臾汝當自見說是語時無量衆生
從種種方所種種世界種種國土種種城邑形類各
別愛欲不同皆以菩薩往昔願力其數無邊俱來集

會各隨所欲而有求請爾時居士知衆普集須臾繫念仰視虛空如其所須悉從空下一切衆會普皆滿足然後復爲說種種法所謂爲得美食而充足者與說種種集福德行離貧窮行知諸法行成就法喜禪悅食行修習具足諸相好行增長成就難屈伏行善能了達無上食行成就無盡大威德力降魔寃行爲得好飲而充足者與其說法令於生死捨離憂著入佛法味爲得種種諸上味者與其說法皆令獲得諸佛如來上味之相爲得車乘而充足者與其宣說種種法門皆令得載摩訶衍乘爲得衣服而充足者與

其說法令得清淨慚愧之衣乃至如來清淨妙色如是
是一切靡不周瞻然後悉爲如應說法既聞法已還
歸本處

疏三善男子我得下正示法界於中二先舉名財法無盡蘊在虛空隨意給施故名隨意出生福德藏亦表見空無不備故後凡有下顯業用於中二一畧舉二善男子且待下舉事現驗於中先見衆集後爾時居士下廣施財法先施財後然後下施法於施一食令成八行初二約施餘六約食食有五果一得知諸法卽是慧命二得喜悅卽常安樂

撰述
華嚴疏鈔卷六十一
三具相好。卽是常色。四六卽常力。五卽常辨。言上
味相者。牙有甘露泉故。餘可準思。鈔食有五果
者。卽涅槃第二如來告純陀云。我今施汝常命色
力。安無礙辯。由施於食。益命。益色。益力。益安。益辯
才故。近得此五。猶是無常。終得常五。並如迴向品
中已釋。今此具配。

爾時居士爲善財童子。示現菩薩不可思議解脫境
界。已告言。善男子。我唯知此。隨意出生。福德藏。解脫
門。如諸菩薩摩訶薩。成就寶手。徧覆一切十方國土。
以自在力。普雨一切資生之具。所謂雨種種色寶種。

種色瓔珞。種種色寶冠。種種色衣服。種種色音樂。種
種色華。種種色香。種種色末香。種種色燒香。種種色
寶蓋。種種色幢幡。徧滿一切衆生住處。及諸如來衆
會道場。或以成熟一切衆生。或以供養一切諸佛。而
我云何能知能說。彼諸功德自在神力。善男子。於此
南方。有一大城。名師子宮。彼有長者。名法寶髻。汝可
往問菩薩云。何學菩薩行。修菩薩道。

疏第四爾時居士下。謙已推勝可知。第五善男子
下。指示後友。城名師子宮者。禪定無亂。如彼深宮。
處之。則所說決定作用無畏。故以爲名。友名法寶

髻者。縮攝諸亂。居心頂故。定含明智。加以寶名。以
喻顯法。名法寶髻。

時善財童子歡喜踊躍。恭敬尊重。如弟子禮。作如是
念。由此居士。護念於我。令我得見一切智道。不斷愛
念。善知識見。不壞尊重。善知識心。常能隨順。善知識
教。決定深信。善知識語。恒發深心事。善知識。頂禮其
足。繞無量市。殷勤瞻仰。辭退而去。

仁和信童張鳳舉捐資五兩七錢刻經一卷。仗此功德。伏願亡父張近思。懺除存日之業。如赫日之
耀。經水銷融。積生之寇。如暴風之捲。危葉所有。仇
對同悟。性空先使。亡者冥資。乃及後人。迺吉。

大方廣佛華嚴經疏鈔卷六十五

終

大方廣佛華嚴經疏鈔卷第六十六

于闐國三藏沙門實叉難陀 譯

清涼山大華嚴寺沙門澄觀撰述

入法界品第三十九之七

爾時善財童子於明智居士所聞此解脫已。遊彼福
德海。治彼福德田。仰彼福德山。趣彼福德津。開彼福
德藏。觀彼福德法。淨彼福德輪。味彼福德聚。生彼福
德力。增彼福德勢。漸次而行。向師子城。周徧推求寶
髻長者。

疏第五法寶髻無癡亂行 六中初文可知。鈔

寄於無癡亂行者以慧資定靜無遺照動不離寂
名無癡亂。

見此長者在於市中。遽即往詣頂禮其足。繞無數匝。
合掌而立。自言聖者。我已先發阿耨多羅三藐三菩
提心。而未知菩薩云何學菩薩行。云何修菩薩道。善
哉聖者。願爲我說諸菩薩道。我乘此道趣一切智。

疏第二見此長者下。見敬諮問市中見者。表處鬧
忘懷亂中常定故。

爾時長者執善財手。將請所居。示其舍宅。作如是言。
善男子。且觀我家。

疏第三爾時長者下。授已法界。於中四。一執手將
引。卽授法方便顯加行智。歸正證故。二作如是下。
示其所住。卽正授法界。三爾時善財見其下。正證
法界。四爾時善財見是下。問答因緣。卽後得智。初
二可知。

爾時善財見其舍宅清淨光明。真金所成。白銀爲牆。
玻瓈爲殿。紺瑠璃寶以爲樓閣。碑磔妙寶而作其柱。
百千種寶周徧莊嚴。赤珠摩尼爲師子座。摩尼爲帳。
真珠爲網。彌覆其上。瑪瑙寶池香水盈滿。無量寶樹
周徧行列。其宅廣博。十層八門。

撰述 華嚴疏鈔卷六十六 二
疏三中二先總後善財入已下別今初十層八門者如八角塔形層門各有三義層別申解門三義者一通約所修之道以八正爲門八正通入於諸位故二約所依之道卽以八識爲門於眼根中入正定故根若能入境則可知三約教顯理卽四句入法教理各四故有八門謂若失意有空俱泯便成四謗得意通入並稱爲門尋教得解卽教四門於理得解卽理四門鈔尋教等者但約詮旨以爲二四亦約教爲信行約理爲法行若準新經言面各二門故有八門則亦可卽就四門存泯不同

以爲八耳如一有門見心妙有而入法界則是有門若取於有卽拂有相名非有門此有中二矣二空者知法空寂卽是空門以空爲空門便權說非空門三若謂妄惑本空眞智不空卽亦有亦空門謂有二體斯門亦權故說妄因眞立妄無妄源眞對妄宜眞非眞矣則雙存兩亡則爲亦有非有亦無非無門四欲言其有無相無名欲言其無聖以之靈爲非有非無門若滯雙非未逃戲論故復拂之此雙非門爲但是遮爲有所表但遮同無有表同有還成有無故此雙非言思亦絕名非非有非

非無門。故有八門。得意爲門。失意此八亦非門矣。善財入已。次第觀察。見最下層施諸飲食。見第二層施諸寶衣。見第三層布施一切寶莊嚴具。見第四層施諸婣女。并及一切上妙珍寶。見第五層乃至五地菩薩雲集演說諸法利益世間成就一切陀羅尼門。諸三昧印。諸三昧行智慧光明。見第六層有諸菩薩。皆已成就甚深智慧。於諸法性明了通達成就廣大。總持三昧無障礙門。不住二法在不可說妙莊嚴道場中。而共集會分別顯示。般若波羅蜜門。所謂寂靜藏般若波羅蜜門。善分別諸衆生智般若波羅蜜門。

不可動轉般若波羅蜜門。離欲光明般若波羅蜜門。不可降伏藏般若波羅蜜門。照衆生輪般若波羅蜜門。海藏般若波羅蜜門。普眼捨得般若波羅蜜門。入無盡藏般若波羅蜜門。一切方便海般若波羅蜜門。入一切世間海般若波羅蜜門。無礙辨才般若波羅蜜門。隨順衆生般若波羅蜜門。無礙光明般若波羅蜜門。常觀宿緣而布法雲般若波羅蜜門。說如是等百萬阿僧祇般若波羅蜜門。見第七層有諸菩薩。得如響。忍以方便智分別觀察。而得出離。悉能聞持諸佛正法。見第八層無量菩薩共集。其中皆得神通無

有退墮能以一音徧十方刹其身普現一切道場盡於法界靡不周徧普入佛境界見佛身普於一切佛衆會中而爲上首演說於法見第九層一生所繫諸菩薩衆於中集會見第十層一切如來克滿其中從初發心修菩薩行超出生死成滿大願及神通力淨佛國土道場衆會轉正法輪調伏衆生如是一切悉使明見

疏別中十層三者一表十地一施食顯初地行檀二地持戒以慚愧爲衣服三地忍行以爲嚴具四地道品爲內眷屬精進可珍五地文顯六地般若現前故文中三初總次所謂下別顯十五門一照體卽寂而無不包二卽寂之照無機不鑿三外緣不轉四內照無求五惑境不摧六徧摧諸惑七包含勝德而甚深八普見法界而無礙九一卽無盡十巧化無邊十一內證世間十二外演勝辨十三曲隨物欲十四事理交羅十五觀緣授法後說如是下總結七地有殊勝行知種種教法故云得如響忍八層之中含於二位一八地無功用之神通二種世間自在二卽九地法師一音能演九層亦二位十地等覺俱可爲一生故十層卽如來地

二表十行。以十行卽十度。故前七文顯。八大願所成神通等故。九一生所繫。力最上故。十唯至如來智方滿故。此卽當位自攝諸位。向攝十地。卽攝後諸位。故以十層雙表二義。還如海幢當位攝盡十位。纔竟說成佛故。前寄第六位攝。此寄第五位攝。前約正報攝。此約依報攝者。皆顯位勝前故。三者總不表位。但此菩薩以行就機。現居勝報。漸次增勝。十顯無盡。初四以物施。後後漸難。次二集法施。前淺後深。次二得法。初陞後廣。後二現勝德。先因後果。總上三義。因果行位等法。以爲長者之宅。

爾時善財見是事已。白言。聖者。何緣致此清淨衆會。種何善根。獲如是報。長者告言。善男子。我念過去過佛刹微塵數劫。有世界名圓滿莊嚴。佛號無邊光明法界普莊嚴王。如來應正等覺。十號圓滿。彼佛入城。我奏樂音。并燒一丸香。而以供養。以此功德。迴向三處。謂離一切貧窮困苦。常見諸佛及善知識。恒聞正法。故獲斯報。

疏四問答因緣中。先問後答。迴向三處者。謂離貧窮。招前四層之報。二三兩果。卽後六重。一九之微因。願力故報勝。又表萬行混融。發起向佛。則隨一

行無不具矣。何果不階。

善男子。我唯知此菩薩無量福德寶藏解脫門。如諸菩薩摩訶薩。得不思議功德寶藏。入無分別如來身海。受無分別無上法雲。修無分別功德道。具起無分別普賢行網。入無分別三昧境界。等無分別菩薩善根。任無分別如來所任證。無分別三世平等。任無分別普眼境界。任一切劫無有疲厭。而我云何能知能說彼功德行。

疏第四善男子下謙已推勝。謙已云菩薩等者。世寶二寶。蘊積十重之中。故云寶藏常用無盡。是爲

無量福德。後推勝中。當法顯勝。故功德寶藏皆不思議。卽是總句。入無分別下別明。由無分別而具諸法。故不思議。

善男子。於此南方。有一國土。名曰藤根。其土有城。名曰普門。中有長者。名爲普眼。汝詣彼問菩薩云。何學菩薩行。修菩薩道。時善財童子頂禮其足。繞無數匝。殷勤瞻仰。辭退而去。

爾時善財童子於寶髻長者所聞此解脫已。深入諸佛無量知見。安住菩薩無量勝行。了達菩薩無量方便。希求菩薩無量法門。清淨菩薩無量信解。明利菩

撰述
華嚴疏鈔卷第六十六
薩無量諸根成就菩薩無量欲樂通達菩薩無量行門增長菩薩無量願力建立菩薩無能勝幢起菩薩智照菩薩法。

疏第六普眼長者寄善現行。鈔寄善現行者慧能顯發三諦之理般若現前故。

疏國名藤根者。夫藤根深入於地上發華苗表善現行般若證深。能生後得。後得隨物而轉。故取類於藤城名普門者。實相般若無所不通故。長者名普眼者。觀照般若無不見故。第一依教趣求中言深入諸佛無量知見者。無量有二義。一多故。即權

智境。二無分量故。即實慧境。境無量。故智亦無量。知見亦二義。一別。謂知即是智。見即是慧。即照二境之智慧。二通者。謂知見二字。俱是如來能證。如實知彼義故。即無障礙智。若爾何假重言。爲揀比知。所以言見。爲揀肉眼見。所以云知。此如世親般若論釋。悉知悉見。入謂證達。餘句易了。鈔知見已下。二釋知見。於中亦二。先別依法華論。後通即般若論。論云。如來悉知是諸衆生。便足。何故復說。如來悉見是諸衆生。若不說如來悉見是諸衆生。或謂如來以比智知。恐生如是心故。若爾但言如

10 1 2 3 4 5 6 7 8 9 20 1 2 3 4 5 6 7 8 9 30 1 2 3 4 5 6 7 8 9

撰述

垂廣疏鈔卷之六十一

八

前

來悉見是諸衆生便足。何故復說如來悉知是諸衆生。若不說如來悉知是諸衆生。或謂如來以肉眼等見。爲防是故說知見二語。功德施論上卷云。何故知見俱說耶。爲開顯一切智故。此復云。何貴於諸境界耶。然現覺非如比智見。煙知有火。不能照了。諸相差別。亦非如肉眼見。麤近。細種遠處。卽不能知。但隨他說。或如彼故。智論二十九明十八。不共法解脫無減中。問曰。解脫知見者。但應言知。何以復言見。答曰。言知言見。事得牢固。言如繩。二合卽爲堅。復次。若但說知。卽不攝一切慧。如阿毘

曇所說慧有三種。有知非見。有見非知。有亦知亦見。有知非見者。盡智無生智。五識相應知。有見非知者。八忍世間正見。五邪見。有亦知亦見者。餘師諸慧。若說知。謂不攝見。若說見。則不攝知。是故說知見。則具足。如復次。從人讀誦分別。籌量是名知。自身得證。是名見。譬如耳聞。事尚有疑。是名知。親自目覩。了了無疑。是名見。解脫中。知見亦如是。差別。瑜伽八十六云。問。知見何差別。答。照過去。及以未來。非現見。境界。名慧。名知。照現在。境界。此總名見。又所取爲緣。此慧名知。能取爲緣。此慧名見。又聞思

支那

華嚴疏鈔卷之六十一

七

撰述
華嚴疏鈔卷之六十一
所成此慧名知。修所成者此慧名見。又能斷煩惱。此慧名知。斷煩惱已能證解脫。此慧名見。又緣自相境。此慧名知。緣共相境。此慧名見。又尋求諸法。此慧名知。既尋求已。伺察諸法。此慧名見。又緣無分別影像。此慧名知。緣有分別影像爲境。此慧名見。又有色爾燄影像爲緣。此慧名見。無色爾燄影像爲緣。此慧名知。釋曰。爾燄爲所緣也。成實論第十九見知品云。問曰。正見正知有何差別。答曰。卽是一體。無有差別。正見二種。世間出世間。世間者。謂有罪福等。出世間者。謂能徧平等。諸諦正智亦

爾。乃至問曰。經中說知者見者。則同漏盡。有何差別。答曰。若智初破惑名知。入諸位已名爲見。始觀名知。達了名見。有如是深淺等別。俱舍二十六通明忍智見別論云。前品初說依法忍法智。於後復說正見智。爲有忍非智耶。爲有智非見耶。頌曰。聖慧忍非智。盡無生非見。餘二有漏慧。皆智六見性。釋曰。初句及第三句餘二字。明無漏慧。有漏已下。明有漏慧也。聖慧忍非智者。聖慧忍。謂見道中八忍也。忍非智。性決斷名智。忍起之時。與非得俱。未成決定斷。故不名智。盡無生非見者。盡無生智。不

撰述
名爲見推度名見此之二智已息求心非推度故
故不名見餘二者餘無漏慧皆通知見二性已斷
疑故推度性故有漏慧皆智六見性者諸有漏慧
皆智性攝於中唯六亦是見性謂身見等五及世
間正見如上聖慧及有漏慧皆擇法故並通性攝
大婆沙九十五論云應具分別見智慧三自性差
別云何爲見答眼根五見世俗正見學無學見問
何故眼根說名爲見答由四事故一賢聖說故二
世俗說故三契經說故四世現見故問何故此五
說名爲見答以四事故一觀視故謂能觀視所應

取境二決度故謂決度所應取境三堅執故謂於
目境堅固僻執非聖道觀不能令捨四深入故謂
於所緣銳利深入如針隨泥云世俗正見者謂善
意識相應慧是見性故說名爲見學見者謂學有
漏慧無學見者謂無學正見此二俱是見性故名
爲見五見於境如陰夜見色世俗正見於境如晴
夜見色有學見於境如陰晝見色無學見於境如
晴晝見色云何爲智答五識相應慧除無漏慧餘
意識相應慧五識相應慧有三種一善二染污三
無覆無記餘論說諸見是智斷應作四句有見非

撰述
華嚴疏鈔卷之六
一
智謂眼根及無漏慧忍。有智非見。謂五識身相應
慧盡無生智。餘五見及世俗正見。餘意識相應有
漏慧。有見亦智。謂五見世俗正見。除無漏忍及盡
無生智。餘有漏慧。卽學八智及無學正見。此無漏
慧及前五見。世俗正見。具見智二種相。故第三句
攝。有見智。謂除前相。相謂所有。若名若法。是前三
句所表。皆名爲相。除此餘法。第四句義。次前來一
經頌有無狀繁文。

漸次而行至藤根國。推問求覓彼城所在。雖歷艱難
不憚勞苦。但唯正念善知識。教願常親近承事供養。

徧策諸根離衆放逸。

疏二趣後可知。

然後乃得見普門城。百千聚落周匝圍繞。雉堞崇峻
衢路寬平。見彼長者。往詣其所。於前頂禮。合掌而立。
自言。聖者。我已先發阿耨多羅三藐三菩提心。而未
知菩薩云何學菩薩行。云何修菩薩道。

疏第二然後乃得下。見敬咨問中。先見依正。百千
聚落周匝圍繞者。眷屬般若也。雉堞崇峻者。般若
防非。高而無上也。五板爲堵。五堵爲雉。堞卽女牆。
衢路寬平者。般若諸佛常行。非權徑故。蕩然無涯。

鈔眷屬般若者。然般若若有五。一實相般若。卽所證理。二觀照般若。卽能證智。三文字般若。卽能論教。古惟有三。新說有五。加第四境界般若。實相唯悟真境。兼後智體。今境界通事。六塵之境。皆爲境界。五眷屬般若。卽與慧同時。諸心心所。今此具五城爲實相。長者爲觀照。釋無量中。已有境界。今有眷屬文字通四。

長者告言。善哉善哉。善男子。汝已能發阿耨多羅三藐三菩提心。善男子。我知一切衆生諸病。風黃痰熱。鬼魅蠱毒。乃至水火之所傷害。如是一切所生諸疾。我悉能以方便救療。善男子。十方衆生。諸有病者。咸來我所。我皆療治。令其得差。復以香湯沐浴其身。香華瓔珞名衣。上服種種莊嚴。施諸飲食。及以財寶。悉令克足。無所乏短。

疏第三長者告下。稱讚授法。先讚後善男子下。授已法界。於中二。先能療病。卽下化衆生。後善男子我又下。明能合香。上供諸佛。今初有二。先除身病。後治心病。前中亦二。先治無不能。後善男子十方下。來者皆治。兼與身樂。

然後各爲如應說法。爲貪欲多者。教不淨觀。瞋恚多

撰述
聖嚴疏鈔卷第六
三
者教慈悲觀愚癡多者教其分別種種法相等分行者爲其顯示殊勝法門爲欲令其發菩提心稱揚一切諸佛功德爲欲令其起大悲意顯示生死無量苦惱爲欲令其增長功德讚歎修集無量福智爲欲令其發大誓願稱讚調伏一切衆生爲欲令其修普賢行說諸菩薩於一切刹一切劫住修諸行網爲欲令其具佛相好稱揚讚歎檀波羅密爲欲令其得佛淨身悉能徧至一切處故稱揚讚歎尸波羅密爲欲令其得佛清淨不思議身稱揚讚歎忍波羅密爲欲令其獲於如來無能勝身稱揚讚歎精進波羅密爲欲

令其得於清淨無與等身稱揚讚歎禪波羅密爲欲令其顯現如來清淨法身稱揚讚歎般若波羅密爲欲令其現佛世尊清淨色身稱揚讚歎方便波羅密爲欲令其爲諸衆生住一切劫稱揚讚歎願波羅密爲欲令其現清淨身悉過一切諸佛刹土稱揚讚歎力波羅密爲欲令其現清淨身隨衆生心悉使歡喜稱揚讚歎智波羅密爲欲令其獲於究竟淨妙之身稱揚讚歎永離一切諸不善法如是施已各令還去疏二然後各爲下治心病亦二先明除惑義通大小後爲欲令其下令其成益此唯大乘有十六句

初五通顯大心行願。次十別明十度之因。感十身之果。施滿他心。故相好悅物。戒徧止惡。故淨身徧至。忍兼忍理。故不思議進策萬行。故無能勝禪。唯一心。故無與等。般若照理。故顯法身。方便顯用。色身可觀。願窮來際。住劫無窮。力不可搖。悉過一切智窮事法。故隨物成身。後一句總離諸惡。故究竟淨妙。鈔次十別明十度之因。感十身果。疏中但按現文直釋。此十亦卽菩提願等如來十身。一施度卽相好莊嚴身。二戒獲益生身。以徧至故。三忍獲威勢身。四進策萬行。故成菩提。五禪獲福德無等。六顯法身。七成化身。八亦成願身。九還成力持。十亦成智身。後一總淨十身。

善男子。我又善知和合一切諸香要法。所謂無等香。辛頭波羅香。無勝香。覺悟香。阿盧那跋底香。堅黑旃檀香。烏洛迦旃檀香。沉水香。不動諸根香。如是等香。悉知調理和合之法。又善男子。我持此香。以爲供養。普見諸佛。所願皆滿。所謂救護一切衆生願。嚴淨一切佛刹願。供養一切如來願。又善男子。然此香時。一香中出無量香。徧至十方一切法界。一切諸佛衆會道場。或爲香宮。或爲香殿。如是香欄檻。香垣牆。香

却敵香戶牖香重閣香半月香蓋香幢香幡香帳香羅網香形像香莊嚴具香光明香雲雨處處充滿以爲莊嚴。

疏二上供佛行中三初知香體辛頭者卽信度河也波羅是岸卽彼岸之香阿盧那跋底此云赤色極烏洛迦者西域蛇名其蛇有毒繞此檀樹故和合者戒定慧等融無礙故次興供起願後能成大供文處並顯。

善男子我唯知此令一切衆生普見諸佛歡喜法門如諸菩薩摩訶薩如大藥王若見若聞若憶念若同住若隨行住若稱名號皆獲利益無空過者若有衆生暫得值遇必令消滅一切煩惱入於佛法離諸苦蘊永息一切生死怖畏到無所畏一切智處摧壞一切老死大山安住平等寂滅之樂而我云何能知能說彼功德行。

疏第四謙已推勝中謙已知一中謂身心病除成二世樂故皆歡喜以香普供得佛十身則何佛不見餘並可知。

善男子於此南方有一大城名多羅幢彼中有王名無厭足汝詣彼問菩薩云何學菩薩行修菩薩道。

撰述
善願疏鈔卷之六十一
時善財童子禮普眼足繞無量市殷勤瞻仰辭退而去。

爾時善財童子憶念思惟善知識教念善知識能攝受我能守護我令我於阿耨多羅三藐三菩提無有退轉如是思惟生歡喜心淨信心廣大心怡暢心踊躍心欣慶心勝妙心寂靜心莊嚴心無著心無礙心平等心自在心住法心徧往佛刹心見佛莊嚴心不捨十力心。

漸次遊行經歷國土村邑聚落至多羅幢城問無厭足王所在之處諸人答言此王今者在於正殿坐師子座宣布法化調御衆生可治者治可攝者攝罰其罪惡決其諍訟撫其孤弱皆令永斷殺盜邪嬖亦令禁止妄言兩舌惡口綺語又使遠離貪瞋邪見特善財童子依衆人語尋卽往詣。

疏第七無厭足王寄無著行鈔寄無著行者方便涉有不迷於空事理無滯不捨不受故名無著。疏第一依教趣求中先念教成益後漸次下趣求後友既入其國必聞其政言多羅者此云明淨幢者建立表無著行依般若淨明立勝行故王名無厭足者如幻方便化無所著故無疲狀心鈔先

念教成益者有十七心。初歡喜爲總。餘十六別。一淨信者。信樂聞法。二下化上求。三法樂怡神。四勇求進趣。五欣慶所得。六悲智雙流。七不取不生。八以德嚴飾。九不著萬境。十不礙起修。十一物我齊均。十二不陂心。使十三無任而任。十四稱理普周。十五見佛相嚴。十六不捨佛智。

遙見彼王坐那羅延金剛之座。阿僧祇寶以爲其足。無量寶像以爲莊嚴。金繩爲網彌覆其上。如意摩尼以爲寶冠。莊嚴其首。闍浮檀香以爲半月。莊嚴其額。帝青摩尼以爲耳瑠。相對垂下。無價摩尼以爲瓔珞。

莊嚴其頸。天妙摩尼以爲甲釧。莊嚴其臂。闍浮檀金以爲其蓋。衆寶間錯以爲輪輻。大瑠璃寶以爲其竿。光味摩尼以爲其齋。雜寶爲鈴。恒出妙音。放大光明。周徧十方。如是寶蓋而覆其上。阿那羅王有大力勢。能伏他衆。無能與敵。以離垢纒而繫其頂。十千大臣前後圍繞。共理王事。其前後有十萬猛卒。形貌醜惡。衣服褊陋。執持器仗。攘臂瞋目。衆生見者無不恐怖。無量衆生犯王教勅。或盜他物。或害他命。或侵他妻。或生邪見。或起瞋恨。或懷貪嫉。作如是等種種惡業。身被五縛。將詣王所。隨其所犯而治罰之。或斷手足。

或截耳鼻。或挑其目。或斬其首。或剝其皮。或解其體。或以湯煮。或以火焚。或驅上高山。推令墮落。有如是等無量。楚毒發聲號叫。譬如衆合大地獄中。善財見已。作如是念。我爲利益一切衆生。求菩薩行。修菩薩道。今者此王滅諸善法。作大罪業。逼惱衆生。乃至斷命。曾不顧懼。未來惡道。云何於此。而欲求法發大悲心。救護衆生。作是念時。空中有天。而告之言。善男子。汝當憶念普眼長者。善知識教。善財仰視而白之曰。我常憶念。初不敢忘。天曰。善男子。汝莫耽離善知識語。善知識者能引導汝。至無險難安隱之處。善男子。

菩薩善巧方便智不可思議。攝受衆生智不可思議。護念衆生智不可思議。成熟衆生智不可思議。守護衆生智不可思議。度脫衆生智不可思議。調伏衆生智不可思議。

疏第二遙見下。見敬咨問中。先見有四。一見勝依正。二其前復有下。觀其逆化。三善財見已下。不了生疑。四作是念時下。空天曉喻於中。二先令憶前教。真實使不生疑。後善男子菩薩善巧下。辨後行深玄。令其信入。然善財雖常憶教而生疑者。逆行難知故。貪益此世。不疑婆須臾。癡現損。故勝熱此。

王並生疑怪言深玄者。通達非道故。梁攝論戒學
中明菩薩逆行殺等。生無量福。得無上菩提。要大
菩薩方堪此事。此有二種。一實行。二變化。實行者
了知前人必定作無間業。無別方便。令離此惡。唯
可斷命使其不作。又知前人若捨命。已必生善道。
又菩薩自念我行殺。已必墮地獄。爲彼受苦。彼雖
現受輕苦。必得樂果。瑜伽菩薩地戒品之中。亦同
此說。言變化者。卽當此文。下王自說。

時善財童子聞此語已。卽詣王所。頂禮其足。白言。聖
者。我已先發阿耨多羅三藐三菩提心。而未知菩薩
云何學菩薩行。云何脩菩薩道。我聞聖者善能教誨。
願爲我說。

疏二時善財下敬問可知。

時阿那羅王理王事已。執善財手。將入宮中。命之同
坐。

疏第三時阿那羅下。授已法界中二。初授法方便。
執手同坐。示無間之儀。表攝彼加行。令趣真故。

告言善男子。汝應觀我所住宮殿。善財如語。卽徧觀
察。見其宮殿廣大無比。皆以妙寶之所合成。七寶爲
牆。周匝圍繞。百千衆寶。以爲樓閣。種種莊嚴。悉皆妙

撰述
善廣疏鈔卷六十六
好不思議摩尼寶網羅覆其上。十億侍女端正殊絕。威儀進止皆悉可觀。凡所施爲無非巧妙。先起後卧。軟意承旨。

疏二告言下。正示法界。令證相應於中四。一舉果令入。

時阿那羅王告善財言。善男子。於意云何。我若實作如是惡業。云何而得如是果報。如是色身。如是眷屬。如是富饒。如是自在。

疏二時阿那羅王告善財下。以實顯權。

善男子。我得菩薩如幻解脫。善男子。我此國土所有

衆生多行殺盜乃至邪見。作餘方便不能令其捨離惡業。善男子。我爲調伏彼衆生故。化作惡人。造諸罪業。受種種苦。令其一切作惡。衆生見是事已。心生惶怖。心生厭離。心生怯弱。斷其所作一切惡業。發阿耨多羅三藐三菩提意。善男子。我以如是巧方便故。令諸衆生捨十惡業。任十善道。究竟快樂。究竟安隱。究竟住於一切智地。

疏三善男子我得下。示其所得。於中初名如幻者。了生如幻。故以幻化幻。次我此國下。明法門業用。後我以如是下。明法門勝益。

撰述
善男子。我身語意未曾惱害於一衆生。善男子。如我心者。寧於未來受無間苦。終不發生一念之意。與一蚊一蟻而作苦事。況復人耶。人是福田。能生一切諸善法故。

疏四善男子我身語下。直顯實得。慈念之淡。然諸位至七皆方便故。休捨觀自在。開敷樹華。多約慈悲。

善男子。我唯得此如幻解脫。如諸菩薩摩訶薩。得無生忍。知諸有趣。悉皆如幻。菩薩諸行。悉皆如化。一切世間。悉皆如影。一切諸法。悉皆如夢。入真實相。無礙法門。修行帝網。一切諸行。以無礙智。行於境界。普入一切平等二昧。於陀羅尼。已得自在。而我云何能知。能說彼功德行。

疏第四謙已推勝。推勝云。無生忍者。由了如幻。方證此忍故。又後位中當此忍故。

善男子。於此南方。有城名妙光。王名大光。汝詣彼問菩薩云。何學菩薩行。修菩薩道。

時善財童子頂禮王足。繞無數匝。辭退而去。

爾時善財童子一心正念。彼王所得幻智法門。思惟彼王如幻解脫。觀察彼王如幻法性。發如幻願。淨如

撰述
聖屬疏鈔卷第六
三
前
幻法普於一切如幻三世起於種種如幻變化如是思惟。

疏第八大光寄難得行第一依教趣求中先念前鈔寄難得行者無障礙願力乃能得故。

漸次遊行或至人間城邑聚落或經曠野巖谷險難無有疲懈未曾休息然後乃至妙光大城而問人言妙光大城在於何所人咸報言妙光城者今此城是大光王之所住處時善財童子歡喜踊躍作如是念我善知識在此城中我今必當親得奉見聞諸菩薩所行之行聞諸菩薩出要之門聞諸菩薩所證之

法聞諸菩薩不思議功德聞諸菩薩不思議自在聞諸菩薩不思議平等聞諸菩薩不思議勇猛聞諸菩薩不思議境界廣大清淨

疏後漸次下趣後於中初推求得知城名妙光者前位悲增今得無住妙慧運衆生故王名大光者慈定之智無不該故廣大願中皆徹照故後時善財童子下自慶當益。

作是念已入妙光城見此大城以金銀瑠璃玻黎真珠磲磔瑪瑙七寶所成七寶深塹七寶圍繞八功德水盈滿其中底布金沙優鉢羅華波頭摩華拘物頭

華芬陀利華徧布其上寶多羅樹七重行列七種金剛以爲其垣各各圍繞所謂師子光明金剛垣無能超勝金剛垣不可沮壞金剛垣不可毀缺金剛垣堅固無礙金剛垣勝妙網藏金剛垣離塵清淨金剛垣悉以無數摩尼妙寶間錯莊嚴種種衆寶而爲埤坵其城縱廣一十由旬周迴八方面開八門皆以七寶周徧嚴飾毘瑠璃寶以爲其地種種莊嚴甚可愛樂其城之內十億衢道一一道間皆有無量萬億衆生於中止住有無數閻浮檀金樓閣毘瑠璃摩尼網羅覆其上無數銀樓閣赤真珠摩尼網羅覆其上無數

毘瑠璃樓閣妙藏摩尼網羅覆其上無數玻瓈樓閣無垢藏摩尼王網羅覆其上無數光照世間摩尼寶樓閣日藏摩尼王網羅覆其上無數帝青摩尼寶樓閣妙光摩尼王網羅覆其上無數衆生海摩尼王樓閣焰光明摩尼王網羅覆其上無數金剛寶樓閣無能勝幢摩尼王網羅覆其上無數黑旃檀樓閣天曼陀羅華網羅覆其上無數無等香王樓閣種種華網羅覆其上其城復有無數摩尼網無數寶鈴網無數天香網無數天華網無數寶形像網無數寶衣帳無數寶蓋帳無數寶樓閣帳無數寶華鬘帳之所彌覆

處處建立寶蓋幢幡。當此城中有一樓閣名正法藏。阿僧祇寶以爲莊嚴。光明赫奕。最勝無比。衆生見者心無厭足。彼大光王常處其中。爾時善財童子於此一切珍寶妙物。乃至男女六塵境界。皆無愛著。但正思惟究竟之法。一心願樂見善知識。

疏第二作是念已下。見敬咨問。初見中三。初見依報中二。先所見殊勝。云十由旬者。欲明圓滿。既有十億衢道道各無量衆生。豈世間十小由旬之所能受。故此中事物皆應圓融表法。如理思之。後爾時善財下。能見無染。

漸次遊行。見大光王去於所住樓閣不遠。四衢道中。坐如意摩尼寶蓮華藏。廣大莊嚴。師子之座。紺瑠璃寶以爲其足。金繒爲帳。衆寶爲網。上妙天衣以爲茵褥。其王於上結跏趺坐。二十八種大人之相。八十隨好。而以嚴身。如真金山。光色熾盛。如淨空日。威光赫奕。如盛滿月。見者清涼。如梵天王。處於梵衆。亦如大海。功德法寶。無有邊際。亦如雪山。相好樹林。以爲嚴飾。亦如大雲。能震法雷。啓悟群品。亦如虛空。顯現種種法門星象。如須彌山。四色普現衆生心海。亦如寶洲。種種智寶。充滿其中。

疏二漸次下見王正報處四衢道者以四無量用
四攝法攝衆生故二十八相者因未滿故。鈔二
十八相因未滿者未見經論及闕無見頂及眉間
白毫梵音長舌以善生等經校量最勝故謂三十
二相不及毫相三十一不及烏瑟尼沙總合不及
如來胸中所出梵音合將二十九相以投白毫三
十中一是梵音故長舌無文義爲勝爾檢之

於王座前有金銀瑠璃摩尼真珠珊瑚琥珀珂貝璧
玉諸珍寶聚衣服瓔珞及諸飲食無量無邊種種克
滿復見無量百千萬億上妙寶車百千萬億諸天妓

樂百千萬億天諸妙香百千萬億病緣湯藥資生之
具如是一切悉皆珍好無量乳牛蹄角金色無量千
億端正女人上妙旃檀以塗其體天衣瓔珞種種莊
嚴六十四能靡不該練世情禮則悉皆善解隨衆生
心而以給施城邑聚落四衢道側悉置一切資生之
具一一道傍皆有二十億菩薩以此諸物給施衆生
爲欲普攝衆生故爲令衆生歡喜故爲令衆生踊躍
故爲令衆生心淨故爲令衆生清涼故爲滅衆生煩
惱故爲令衆生知一切義理故爲令衆生入一切智
道故爲令衆生捨冤敵心故爲令衆生離身語惡故

爲令衆生拔諸邪見故爲令衆生淨諸業道故

疏三於王座前下。王伴攝生於中亦三。先列所施
通情非情六十四能義如別說次一一道下。明能
施人卽是助伴。後爲欲普攝下。明其施意。

時善財童子五體投地頂禮其足。恭敬右繞。經無量
而合掌而住。白言。聖者我已先發阿耨多羅三藐三
菩提心而未知菩薩云何學菩薩行。云何修菩薩道。
我聞聖者善能誘誨願爲我說。

疏二三敬問可知。

時王告言善男子我淨修菩薩大慈幢行我滿足善

薩大慈幢行

疏第三時王告下。授已法界中三。一總示法門。謂

大慈首出離染圓滿故。

善男子我於無量百千萬億乃至不可說不可說佛
所問難此法思惟觀察修習莊嚴。

疏二善男子我於下。明得法因緣問難是聞慧以
三種慧莊嚴此慈。

善男子我以此法爲王以此法教勅以此法攝受以
此法隨逐世間以此法引導衆生以此法令衆生修
行以此法令衆生趣入以此法與衆生方便以此法

撰述
聖賢通鑑卷六十六
三
令衆生熏習以此法令衆生起行以此法令衆生安
任思惟諸法自性以此法令衆生安任慈心以慈爲
主具足慈力如是令任利益心安樂心哀愍心攝受
心守護衆生不捨離心拔衆生苦無休息心我以此
法令一切衆生畢竟快樂恒自悅豫身無諸苦心得
清涼斷生死憂樂正法樂滌煩惱垢破惡業障絕牛
死流入真法海斷諸有趣求一切智淨諸心海生不
壞信善男子我已住此大慈幢行能以正法教化世
間善男子我國土中一切衆生皆於我所無有恐怖
善男子若有衆生貧窮困乏來至我所而有求索我

開庫藏恣其所取而語之言莫造諸惡莫害衆生莫
起諸見莫生執著汝等貧乏若有所須當來我所及
四衢道一切諸物種種具足隨意而取勿生疑難善
男子此妙光城所任衆生皆是菩薩發大乘意隨心
所欲所見不同或見此城其量狹小或見此城其量
廣大或見土砂以爲其地或見衆寶而以莊嚴或見
聚土以爲垣牆或見寶牆周而圍繞或見其地多諸
瓦石高下不平或見無量大摩尼寶間錯莊嚴平坦
如掌或見屋宅土木所成或見殿堂及諸樓閣堦墀
窻闥軒檻戶牖如是一切無非妙寶善男子若有衆

撰述
善願正金卷六十六
生其心清淨。曾種善根。供養諸佛。發心趣向一切智道。以一切智爲究竟處。及我昔時修菩薩行。曾所攝受。則見此城衆寶嚴淨。餘皆見穢善男子。此國土中一切衆生。五濁世時。樂作諸惡。我心哀愍。而欲救護。入於菩薩大慈爲首。隨順世間三昧之門。入此三昧時。彼諸衆生。所有怖畏心。惱害心。冤敵心。諍論心。如是諸心。悉自消滅。何以故。入於菩薩大慈爲首。順世三昧。法如是。故善男子。且待須臾。自當現見。時大光王。卽入此定。其城內外。六種震動。諸寶地。寶牆。寶堂。寶殿。臺觀。樓閣。階砌。戶牖。如是一切。咸出妙音。悉向

於王。曲躬敬禮。妙光城內。所有居人。靡不同時歡喜。踊躍。俱向王所。舉身投地。村營城邑。一切人衆。咸來見王。歡喜敬禮。近王所。任鳥獸之屬。互相瞻視。起慈悲心。咸向王前。恭敬禮拜。一切山原。及諸草樹。莫不迴轉向王。敬禮。陂池泉井。及以河海。悉皆騰溢。流注王前。十千龍王。起大香雲。激電震雷。注微細雨。有十千天王。所謂忉利天王。夜摩天王。兜率陀天王。善變化天王。他化自在天王。如是等而爲上首。於虛空中。作衆妓樂。無數天女。歌詠讚歎。雨無數華雲。無數香雲。無數寶鬘雲。無數寶衣雲。無數寶蓋雲。無數寶幢

撰述
善廣政金卷六十一
云無數寶幡雲於虛空中而爲莊嚴供養其王伊羅婆拏大象王以自在力於虛空中敷布無數大寶蓮華垂無數寶瓔珞無數寶繒帶無數寶鬘無數寶嚴具無數寶華無數寶香種種奇妙以爲嚴飾無數姝女種種歌讚闍浮提內復有無量百千萬億諸羅刹王諸夜叉王鳩槃荼王毘舍闍王或住大海或居陸地飲血噉肉殘害衆生皆起慈心願行利益明識後世不造諸惡恭敬合掌頂禮於王如闍浮提餘三天下乃至三千大千世界乃至十方百千萬億那由他世界中所有一切毒惡衆生悉亦如是

疏三善男子我以此下明其業用於中五一以法攝化二我國中下以無畏攝三若有衆生下以財寶攝四此妙光城下隨機徧攝五善男子此國土中下以三昧攝於中二先以言告後時大光王下正以定示顯定業用情與非情咸成勝益者謂同體大慈物我無二故如世間王德合乾坤則麟鳳來儀寶璧呈瑞況於出世慈力不令草木屈膝耶

時大光王從三昧起告善財言善男子我唯知此菩薩大慈爲首隨順世間三昧門如諸菩薩摩訶薩爲

高蓋慈心普蔭諸衆生故爲修行下中上行悉等行
故爲大地能以慈心任持一切諸衆生故爲滿月福
德光明於世間中平等現故爲淨日以智光明照耀
一切所知境故爲明燈能破一切衆生心中諸黑闇
故爲水清珠能清一切衆生心中諂誑濁故爲如意
寶悉能滿足一切衆生心所願故爲大風速令衆生
修習三昧入一切智大城中故而我云何能知其行
能說其德能稱量彼福德大山能瞻仰彼功德衆星
能觀察彼大願風輪能趣入彼甚深法門能顯示彼
莊嚴大海能闡明彼普賢行門能開示彼諸三昧窟
能讚歎彼大慈悲雲

疏第四時大光王從三昧下謙已推勝先謙已知
一慈本爲物名順世間高出衆行故名爲首卽是
幢義餘並可知

善男子於此南方有一王都名曰安住有優婆夷名
曰不動汝詣彼問菩薩云何學菩薩行修菩薩道
時善財童子頂禮王足繞無數匝慇懃瞻仰辭退而
去

爾時善財童子出妙光城遊行道路正念思惟大光
王教憶念菩薩大慈幢行門思惟菩薩隨順世間三

毘盧金卷六十六
三
增長一切菩薩根芽。又作是念。善知識者。能普救護。一切惡道。能普演說諸平等法。能普顯示諸夷險道。能普開闡大乘奧義。能普勸發普賢諸行。能普引到一切智城。能普令人法界大海。能普令見三世法海。能普授與衆聖道場。能普增長一切白法。善財童子如是悲哀思念之時。彼常隨逐覺悟菩薩。如來使天於虛空中而告之言。善男子。其有修行善知識教。諸佛世尊悉皆歡喜。其有隨順善知識語。則得近於一切智地。其有能於善知識語無疑惑者。則常值遇一切善友。其有發心願常不離善知識者。則得具足一切

諸善行。出生一切菩薩淨念。出生一切陀羅尼輪。出生一切三昧光明。出生一切諸佛知見。普雨一切諸佛法雨。顯示一切菩薩願門。出生難思智慧光明。增長一切菩薩根芽。又作是念。善知識者。能普救護。一切惡道。能普演說諸平等法。能普顯示諸夷險道。能普開闡大乘奧義。能普勸發普賢諸行。能普引到一切智城。能普令人法界大海。能普令見三世法海。能普授與衆聖道場。能普增長一切白法。善財童子如是悲哀思念之時。彼常隨逐覺悟菩薩。如來使天於虛空中而告之言。善男子。其有修行善知識教。諸佛世尊悉皆歡喜。其有隨順善知識語。則得近於一切智地。其有能於善知識語無疑惑者。則常值遇一切善友。其有發心願常不離善知識者。則得具足一切

撰述
華嚴疏鈔卷之十六
三
龍
切義利善男子。汝可往詣安住王都。卽當得見不動
優婆夷大善知識。

疏第九不動優婆夷寄善法行。自發心來。於一切
法無不得定。煩惱二乘不能動故。亦令衆生心不
動故。以智修慈。故示以女。居安住王都者。王子位
故。智契實法。不爲緣壞。名爲安住。鈔寄善法行。
說法授人。動成物軌。思擇修習一切法故。

疏第一依教趣求中。二先依教後趣求。前中有五。
一思修前法。二生歡喜下。因修得益。無濁約無他。
清淨約自體。三如是思惟下。推功歸友。至此偏悲

者。修悲將滿故。四又作是念下。廣歎友能。五善財
童子如是悲哀下。勝緣印勸。於中先印。天字兩用。
故晉本云。如來使天。隨菩薩天。隨菩薩天。是已業
行之神。如來使天。是佛力攝生神。但修行位已著。
皆有二天常隨其人。後汝可詣下。勸詣後友。

時善財童子從彼三昧智光明起。漸次遊行。至安住
城。周徧推求。不動優婆夷。今在何所。無量人衆咸告
之言。善男子。不動優婆夷。身是童女。在其家內。父母
守護。與自親屬。無量人衆演說妙法。善財童子聞是
語已。其心歡喜。如見父母。卽詣不動優婆夷舍。

疏二時善財童子從彼下趣求後友可知。

入其宅內。見彼堂宇金色光明。普皆照耀。遇斯光者。身意清涼。善財童子光明觸身。卽時獲得五百三昧門。所謂了一切希有相三昧門。入寂靜三昧門。遠離一切世間三昧門。普眼捨得三昧門。如來藏三昧門。得如是等五百三昧門。以此三昧門故。身心柔軟。如七日胎。又聞妙香。非諸天龍乾闥婆等人與非人之所能有。善財童子前詣其所。恭敬合掌。一心觀察。見其形色端正殊妙。十方世界一切女人無有能及。況其過者。唯除如來。及以一切灌頂菩薩。口出妙香。宮

殿莊嚴。并其眷屬。悉無與等。況復過者。十方世界一切衆生。無有於此優婆夷所起染著心。若得暫見。所有煩惱。悉自消滅。譬如百萬大梵天王。決定不生欲界煩惱。其有見此優婆夷者。所有煩惱。應知亦然。十方衆生。見此女人。皆無厭足。唯除具足大智慧者。

疏第二入其宅內。下見敬咨問。見中分二。先見依獲益。後善財童子前詣下。見正超倫。

爾時善財童子曲躬合掌。正念觀察。見此女人。其身自在。不可思議。色相容顏。世無與等。光明洞徹。物無能障。普爲衆生。而作利益。其身毛孔。恒出妙香。眷屬

無邊宮殿第一。功德深廣。莫知涯際。心生歡喜。以頌讚曰。

守護清淨戒。修行廣大忍。精進不退轉。光明照世間。爾時善財童子說此頌已。白言。聖者。我已先發阿耨多羅三藐三菩提心。而未知菩薩云何學菩薩行。云何修菩薩道。我聞聖者善能誘誨。願爲我說。

疏二爾時善財曲躬下。敬問可知。

時不動優婆夷以菩薩柔軟語。悅意語。慰喻善財而告之言。善哉善哉。善男子。汝已能發阿耨多羅三藐三菩提心。

疏第三時不動下。稱讚授法。於中先讚。

善男子。我得菩薩難摧伏智慧藏解脫門。我得菩薩堅固受持行門。我得菩薩一切法平等地總持門。我得菩薩照明一切法辯才門。我得菩薩求一切法無疲厭三昧門。

疏後善男子我得下。正授法界。於中二。先示法門名體。後善財童子言下。徵業用之境界。今初不同前例。而舉五法者。亦同九地當法師位。須廣知故。五中初二所持內德。一智慧無羈。偏名解脫。有智則煩惱不可壞。取著無能勝。故云難摧伏。此智包

容故名爲藏。二受持堅固。偏得行名。謂遇惡衆生而能堪忍。徧生諸趣。而心不迷。故云堅固。三卽能持深入法門。得法性地。則無不持矣。四卽外化。由正思佛法。明照差別。故得辨才。能轉法輪。稱衆生欲。五卽上求。一心求法。故云三昧。近佛無厭。受法無足故。鈔五中初二所持內德等者。然此五法卽下因中所念五事。謂思惟如來福德智慧。皆悉清淨。總持三昧。不可思議神通自在。辨才無礙。謂思念何因得斯五事。彼佛便教發十種心。一應發不可壞心。滅諸煩惱。二應發無能勝心。破諸取著。

三應發無退怯心。入深法門。四應發能堪耐心。救惡衆生。五應發無迷惑心。普入於一切諸趣受生。六應發無厭足心。求見諸佛。無有休息。七應發無知足心。悉受一切如來法雨。八應發正思惟心。普生一切佛法光明。九應發大住持心。普轉一切諸佛法輪。十應發廣流通心。隨衆生欲。施其法寶。釋曰。十中初二成其所念福智。故今得第一摧伏智。慧藏解脫門。疏取下佛教。以釋其相。下四亦爾。次以第三無退怯心。酬其所念總持。故今得一切法平等總持門。三以第四救惡衆生。及第五諸趣受

生。示神通因。今得菩薩堅固受持行門。徧生五趣。救惡衆生。是大神通。是菩薩行故。四以第六求佛無厭。第七受法無足心。酬其三昧。今得求一切法無疲厭門。五以後三。示其辨才無礙因。今得第四。照明一切法辨才門。在文可知。故疏取下十句。示因。釋今所得五法之果。而念福德。舍在智慧之中。其下釋十法中。方云上來。已取十句。釋五法門。但與下念五法不次。顯無優劣故。

善財童子言。聖者。菩薩難摧伏。智慧難解脫門。乃至求一切法無疲厭。三昧門境界云。何童女言。善男子。此處難知。善財自言。唯願聖者承佛神力。爲我宣說。我當因善知識。能信能受。能知能了。趣入觀察。修習隨順。離諸分別。究竟平等。

疏二徵業用之境界中。四一徵問。二顯難。三重請。四廣答。

優婆夷言。善男子。過去世中。有劫名離垢。佛號脩臂。時有國王。名曰電授。唯有一女。卽我身是。我於夜分。廢音樂時。父母兄弟。悉已眠寢。五百童女。亦皆昏寐。我於樓上。仰觀星宿。於虛空中。見彼如來。如寶山王。無量無邊。天龍八部。諸菩薩衆。所共圍繞。佛身普放。

大光明網周徧十方無所障礙佛身毛孔皆出妙香
我聞是香身體柔軟心生歡喜便從樓下至於地上
合十指爪頂禮於佛又觀彼佛不見頂相觀身左右
莫知邊際思惟彼佛諸相隨好無有狀足竊自念言
此佛世尊作何等業獲於如是上妙之身相好圓滿
光明具足眷屬成就宮殿嚴好福德智慧悉皆清淨
總持三昧不可思議神通自在辯才無礙善男子爾
時如來知我心念卽告我言汝應發不可壞心滅諸
煩惱應發無能勝心破諸取著應發無退怯心入深
法門應發能堪耐心救惡眾生應發無迷惑心普於

一切諸趣受生應發無狀足心求見諸佛無有休息
應發無知足心悉受一切如來法雨應發正思惟心
普生一切佛法光明應發大住持心普轉一切諸佛
法輪應發廣流通心隨眾生欲施其法寶善男子我
於彼佛所聞如是法求一切智求佛十力求佛辯才
求佛光明求佛色身求佛相好求佛衆會求佛國土
求佛威儀求佛壽命發是心已其心堅固猶如金剛
一切煩惱及以二乘悉不能壞善男子我發是心已
來經闍浮提微塵數劫尚不生於念欲之心況行其
事爾所劫中於自親屬不起瞋心況他衆生爾所劫

中於其自身不生我見。況於眾具而計我所。爾所劫中死時生時及任胎藏未曾迷惑起眾生想及無記心。況於餘時。爾所劫中乃至夢中隨見一佛未曾忘失。何況菩薩十眼所見。爾所劫中受持一切如來正法。未曾忘失一文一句。乃至世俗所有言辭。尚不忘失。何況如來金口所說。爾所劫中受持一切如來法海。一文一句。無不思惟。無不觀察。乃至一切世俗之法。亦復如是。爾所劫中受持如是一切法海。未曾於一法中不得三昧。乃至世間技術之法。一一法中悉亦如是。爾所劫中任持一切如來法輪。隨所任持未

曾廢捨一文一句。乃至不曾生於世智。唯除爲欲調眾。生故。爾所劫中見諸佛海。未曾於一佛所不得成就清淨大願。乃至於諸化佛之所。悉亦如是。爾所劫中見諸菩薩修行妙行。無有一行我不成就。爾所劫中所見眾。生無一眾。生我不勸發阿耨多羅三藐三菩提心。未曾勸一眾。生發於聲聞辟支佛意。爾所劫中於一切佛法。乃至一文一句不生疑惑。不生二想。不生分別想。不生種種想。不生執著想。不生勝劣想。不生愛憎想。善男子。我從是來。常見諸佛。常見菩薩。常見真實善知識。常聞諸佛願。常聞菩薩行。常聞菩

薩波羅密門常聞菩薩地智光明門常聞菩薩無盡藏門常聞入無邊世界網門常聞出生無邊衆生界因門常以清淨智慧光明除滅一切衆生煩惱常以智慧生長一切衆生善根常隨一切衆生所樂示現其身常以清淨上妙言音開悟法界一切衆生。

疏答中二。先明得法因緣以彰深遠。釋上難知。二善男子我得菩薩求一切下。顯其業用以酬初問。今初分六。一舉往見佛爲發心緣。二便從樓下內。與觀念爲發心因。先觀後念。念佛智等。卽前五法之因。神通自在。是行堅固。三善男子爾時下。佛勸

發心能成前五有十種心。初二成智慧。次一成總持。次二成神通。次二成三昧。後三成辨才。故上來取斯十句。釋五法門。四善男子我於彼下。正明發心堅固。五我發是心已來下。經久無違。六我從是來下。彰發心勝益。卽前五因之果。鈔彰發心之益。卽前五之果者。一求佛智慧。卽求法三昧。二求佛十力。卽求智慧。三求佛辨才。四求佛光明。卽是總持。總持以慧爲體。故云光明。餘皆堅固受持。行願發是心已下。總結堅固。

善男子我得菩薩求一切法無厭足莊嚴門我得一

切法平等地總持門。現不思議自在神變。汝欲見不
善財言。唯我心願見。爾時不動優婆夷。坐於龍藏師
子之座。入求一切法無厭足莊嚴三昧門。十力智輪
現前三昧門。佛種無盡藏三昧門。入如是等一萬三
昧門。入此三昧門時。十方各有不可說佛刹微塵數
世界六種震動。皆悉清淨瑠璃所成。一世界中有一
百億四天下。百億如來。或住兜率天。乃至般涅槃。一
一如來放光明網。周徧法界。道場衆會。清淨圍繞。轉
妙法輪。開悟群生。時不動優婆夷。從三昧起。告善財
言。善男子。汝見此不善財言。唯我皆已見。

疏二顯其業用中四。一許現。卽舉五法中二。二申
請三正現。入一萬三昧者。於一求法無厭三昧。卽
入一萬。明知餘解脫等。亦攝多門。四出定。卽述並
可知。

優婆夷言。善男子。我唯得此求一切法無厭足三昧
光明。爲一切衆生說微妙法。皆令歡喜。如諸菩薩摩
訶薩。如金被鳥遊行虛空。無所障礙。能入一切衆生
大海。見有善根已成熟者。便卽執取。置菩提岸。又如
商客入大寶洲。采求如來十力智寶。又如魚師持正
法網。入生死海。於凌水中。漉諸衆生。如阿脩羅王。能

撰述
華嚴疏鈔卷六十六
五
徧托動三有大城諸煩惱海。又如日輪出現虛空。照
覆水泥。令其乾竭。又如滿月出現虛空。令可化者。心
華開敷。又如大地。普皆平等。無量衆生於中止住。增
長一切善法根芽。又如大風所向無礙。能拔一切諸
見大樹。如轉輪王遊行世間。以四攝事攝諸衆生。而
我云何能知能說彼功德行。

疏第四優婆夷言下。謙已推勝。

善男子。於此南方有一大城。名無量都薩羅。其中有
一出家外道。名曰徧行。汝往彼問菩薩云。何學菩薩
行。脩菩薩道。

疏第五指示後友中都薩羅者。此云喜出生。謂此
城中出生。無量歡喜之事故。以智度圓滿。則能無
所不生。友名徧行。巧智隨機。無不行故。名真實行。
示外道者。能行非道。又非道不染。故曰出家。餘可
知。

時善財童子頂禮其足。繞無量市。殷勤瞻仰。辭退而
去。

信官周之楹募助銀六兩七分二釐。刺此一卷衆
檀姓名開後。

姚門那氏助銀一兩二錢

姚門崔氏助銀伍錢

信女高氏助銀四錢
信女洪氏助銀四錢

信童昇官助銀一錢

信人俞毅助銀四錢

信童姚湛

信人金應掙助二錢

花女姚淑德 共助銀一兩

信人于正龍助三錢

信童姚翰助銀一兩

信人王俊元助二錢

信童陳一言陳泰元共助一錢七分二釐圓滿
領袖周之楹仗此勝因願萱堂壽而且康

大方廣佛華嚴經疏鈔卷六十六 終



テノ五

四